



## Saksframlegg

<b>Saksnr:</b>	<b>Utval:</b>	<b>Dato</b>
	Levekårsutvalet	
<b>Sakshandsamar:</b>	Sektor oppvekst	Kristin Moe
	Arkivnr.: 15/3035	Klassering:

### Framlegg til planprogram for kommunedelplan oppvekst

#### Rådmannen sitt framlegg til vedtak

Planprogram for kommunedelplan oppvekst 2016-2028 blir vedteke slik det ligg føre.

#### Saksopplysningar:

##### Politisk handsaming

Saks skal til uttale i Råd for menneske med nedsett funksjonsevne

Saka skal avgjerast i Levekårsutvalet

##### Bakgrunn

Framlegg til planprogram for kommunedelplan oppvekst har vore til høyring. Rådmannen har vurdert høyringsinnspela og utarbeidd endeleg framlegg til kommunedelplan oppvekst for 2016-2028.

##### Vurdering

Rådmannen har i sitt endelege framlegg til kommunedelplan for oppvekst utvida planperioden til inntil 12 år. Dette for at planverket skal vere i samsvar med overordna planverket.

Kommunedelplan for oppvekst dannar med dette utgangspunktet for ein 4-årig handlingsdel på kommunenivå og verksemdsplanar på einingsnivå/avdelingsnivå. Handlingsdelen skal rullerast årleg, og endringar i overordna planverket kan arbeidast inn i rullert kommunedelplan for oppvekst.

Rådmannen er i prosess med einingsleiarane i høve til å utarbeide felles mal for verksemdsplanar for einingane.

I samband med høyringa har det kome innspel frå SU ved Alversund skule, SU/SKMU ved Myking skule samt Utdanningsforbundet Lindås.

SU ved Alversund skule gir i sitt skriv støtte til framlegget til planprogrammet og peikar på at det er viktig at dei føresette vert godt representerte i det vidare arbeidet med kommunedelplanen. SU ønskjer også at ein skal sjå nærare på etablering av eit kommunalt FAU. Dette for å ivareta dei

føresette sine interesser betre både i arbeidet med denne kommunedelplanen, samt i anna arbeid det er viktig at føresette si stemme er til stades og blir høyrte.

Rådmannen er samd i at involvering av dei føresette er svært viktig i denne prosessen. Føresette har fått ein representant i prosjektgruppa og tre plassar i referansegruppa. I tillegg har rådmannen fremja sak om å etablere eit kommunalt foreldreutval for barnehagar og skular i kommunen. Denne saka er no til høyring hjå SU ved barnehagar og skular i kommunen. I fall kommunalt foreldreutval blir etablert i vår -16, vil dette utvalet vere ein naturleg samarbeidspart inn mot planarbeidet.

SU/SKMU ved den einskilde skule vil gjennom planprosessen også ha høve til å spele inn synspunkt til arbeidet til kommunalsjef for oppvekst.

SU/SKMU ved Myking skule peikar i sitt innspel på at «dette arbeidet høyrer naturleg inn under den «Strategiske delen av kommuneplanen».

Etter plan- og bygningslova § 10-1 skal kommunestyret minst ein gong i kvar valperiode, og seinast innan eitt år etter konstituering, utarbeide og vedta ein kommunal planstrategi. Kommunestyret i Lindås skal ha kommunal planstrategi opp som sak med det første. I denne prosessen vil ein arbeide med ein samla kommuneplan som omfattar ein samfunnsdel med handlingsdel og arealdel. Kommuneplanen skal ha ein handlingsdel som viser korleis ein skal følgje opp planen dei komande fire åra eller meir, og den skal reviderast årleg. Dette i samsvar med plan- og bygningslova § 11-1.

Når ein no set i verk arbeidet med ein kommunedelplan for oppvekst, utan at overordna kommunal planstrategi er utarbeidd for valperioden, må ein ta utgangspunkt i dei planane som i dag ligg føre. Vidare må ein ved seinare rullering av kommunedelplan arbeide inn moment frå overordna planstrategi. Samfunnsdelen i kommuneplanen vil slik danne premiss og føringar for kommunedelplan for oppvekst.

Utdanningsforbundet i Lindås har kome med innspel om at omgrepa «tidleg innsats» og «tideleg intervensjon» ikkje bør nemnast om kvarandre. I endeleg kommunedelplan vil ein definere kva ein legg i desse omgrepa, som blir brukt og oppfatta noko ulikt mellom fagområda.

Eitt anna innspel frå Utdanningsforbundet Lindås er at ordet «aktør» bør erstattast med «tilsette og mottakarar av tenestetilbodet». Etter diskusjon i prosjektgruppa vurderer rådmannen det slik at ordet aktør er meir dekkande i høve til at ein ønskjer å signalisere aktiv handling og deltaking frå alle hald (born, unge, vaksne, føresette, tilsette), og at ein difor held fast ved dette ordet også i vidare arbeid. Ordet aktør er definert i planprogrammet (barn, unge, vaksne, føresette, tilsette).

Utdanningsforbundet kjem også med framlegg om å endre punkt 3 under Hovudpunkt 4 –Mål til «Oversikt over kommunen sine prioriteringar og tiltak skal vere lett tilgjengeleg for tilsette og mottakarar av tenester». Rådmannen er samd med Utdanningsforbundet i intensjonen om at prioriteringar og tiltak skal vere lett tilgjengeleg, men vurderer at gjeldande ordlyd « Aktørar innafør sektoren kjenner til kommunen sine prioriteringar og tiltak knytt til kvalitetsplane» er ei formulering som krev meir aktiv handling frå organisasjonen, t.d. ved at tilsette tek initiativ til at andre skal fange opp og gjere seg nytte av informasjonen.

Utdanningsforbundet kjem med framlegg om å leggje til *tilsette sine organisasjonar* i punkt 6 under Hovudmål 4 – Mål, at det ikkje bør vere elevrepresentant i prosjektgruppa samt at det bør vere med

eit kulepunkt om prosess i avdelingane under underpunkt 2 medverknad. Rådmannen støttar desse framlegga, og har arbeidd det inn i justert framlegg til planprogram. I høve til elevrepresentantar i prosjektarbeidet, rår rådmannen til at det ungdomsråd og elevråd ved ungdomsskulane i kommunen kan fungere som ei referansegruppe. Dette i tillegg til ei tverrfagleg samansett referansegruppe og råd for menneske med nedsett funksjonsevne, som også er sett opp som referansegruppe for prosjektet.

I høve til representantar i referansegruppa, ber Utdanningsforbundet om at dei blir peika ut i samarbeid med arbeidstakarorganisasjonane. Rådmannen rår til at dette blir handsama i einingane, samt at leiarane ser til at denne prosessen vert handsama i dialog med trepartsgruppa lokalt.

Rådmannen har gått gjennom høyringsinnspela med deltakarane i prosjektgruppa og konkluderer så langt med at dei justeringane som er gjort i planprogrammet har vore med på å spisse formuleringane til det betre. Rådmannen vurderer det slik at ein kan ta til med prosess for å utarbeide framlegg til kvalitetsplan for oppvekstsektoren.

**Vedlagte saksdokument:**

Kommunedelplan for Oppvekst - planprogram etter gjennomført høyring (2)	86827	17.11.2015
Særutskrift sak 4 - møte i SU-SKMU Myking skule 17-09-15 - uttale til høyring planprogram kommunedelplan oppvekst 2016-2019	79956	17.11.2015
Merknad til framlegg til planprogram for kommunedelplan oppvekst 2016 - 2019	82688	17.11.2015
Uttale planprogram - kommunedelplan oppvekst	83017	17.11.2015
Uttale til planprogram - kommunedelplan for oppvekst 2016 - 2019	83016	17.11.2015

**Ikkje vedlagte saksdokument:**

Doknr	Type	Dato	Tittel på saksdokumentet
Doknr	Type	Dato	Tittel på journalpost